



REPUBLIKA E KOSOVËS/REPUBLIKA KOSOVA

GJYKATA KOMERCIALE

Numri i lëndës: 2023:196726

Datë: 03.05.2024

Numri i dokumentit: 05655599

KA.nr.386//23

GJYKATA KOMERCIALE E KOSOVËS, Dhomat e Shkallës së Parë, Departamenti për Çështje Administrative, gjyqtarja Vlora Pacolli-Rexhepi, në konfliktin administrativ sipas padisë së paditësit “The Business Club” L.L.C, me seli në Prishtinë, me NUI: 812011683, i përfaqësuar sipas autorizimit nga Vegim Kraja avokat nga Prishtina, kundër të paditurës Ministria e Industrisë dhe Tregtisë, Komisioni për Shqyrtimin e Ankesave për Regjistrim të Bizneseve, me seli Prishtinë, me kërkesë për anulimin e vendimit 5341/01-KOM të datës 11.09.2023, i nxjerrë nga Komisioni për Shqyrtimin e Ankesave për Regjistrimin e Bizneseve, vendimit me numër 522 të datës 07.08.2023 i nxjerr nga zv. Drejtoresha e Përgjithshme e ARBK-së, pas mbajtjes së seancës së shqyrtimit kryesor me datë 15.04.2024 me pjesëmarrje të përfaqësuesit të autorizuar të paditësit, në mungesë të përfaqësuesit të paditurës, më datë 29.04.2024 merr këtë:

A K T G J Y K I M

- I. APROVOHET e bazuar kërkesëpadia e paditësit “The Business Club” L.L.C, me seli në Prishtinë, me NUI: 812011683.
- II. ANULOHET vendimit me shifrën 5341/01-KOM të datës 11.09.2023, i nxjerrë nga Komisioni për Shqyrtimin e Ankesave për Regjistrimin e Bizneseve, vendimit me numër 522 të datës 07.08.2023 i nxjerr nga zv. Drejtoresha e Përgjithshme e ARBK-së.
- III. Ky aktgjykim i zëvendëson aktet e anuluar dhe ka karakter detyrues.
- IV. Mbetet në fuqi shtyrja e ekzekutimi të vendimit me shifrën 5341/01-KOM të datës 11.09.2023, i nxjerrë nga e paditura Komisioni për shqyrtimin e Ankesave për

Regjistrimin e Bizneseve, Ministria e Industrisë, Ndërmarrësisë dhe Tregtisë deri në plotfuqishmëri të këtij aktgjykimi.

V. Secila palë i bartë shpenzimet e veta procedurale.

A r s y e t i m

Historiku procedural

1. Me datë 15.09.2023 paditësi “The Business Club” L.L.C, me seli në Prishtinë, me NUI: 812011683, i përfaqësuar sipas autorizimit nga Vegim Kraja avokat ka parashtruar padi kundër të paditurës Ministria e Industrisë dhe Tregtisë, Komisioni për Shqyrtimin e Ankesave për Regjistrim të Bizneseve, me seli Prishtinë, me kërkesë për anulimin e vendimit 5341/01-KOM të datës 11.09.2023, i nxjerrë nga Komisioni për Shqyrtimin e Ankesave për Regjistrimin e Bizneseve, vendimit me numër 522 të datës 07.08.2023 i nxjerr nga zv. Drejtoresha e Përgjithshme e ARBK-së, me kërkesë për shtyrje të ekzekutimit të vendimit të kundërshtuar.
2. Gjykata me Aktvendim të datës 26.10.2023 ka caktuar masën e shtyrjes së ekzekutimi të vendimit me shifrën 5341/01-KOM të datës 11.09.2023 i nxjerrë nga e paditura Komisioni për shqyrtimin e Ankesave për Regjistrimin e Bizneseve, Ministria e Industrisë, Ndërmarrësisë dhe Tregtisë, deri ne vendosjen e kërkesëpadisë me vendim gjyqësor.
3. Gjykata mbajti seancë të shqyrtimit kryesor publik, më datë 15.04.2023 me pjesëmarrje të përfaqësuesit të autorizuar të paditësit avokat Vegim Kraja, sipas autorizimit të datës 16.02.2024, ndërsa në mungesë të përfaqësuesit të palës së paditur të ftuar në mënyrë të rregullt, e paditura ftesën e ka pranuar më datë 25.03.2024, prandaj seanca u mbajt në mungesë të përfaqësuesit të palës së paditur konform nenit 41 të LPK-së.

Pretendimet e paditësit

4. Përfaqësuesi i paditësit në padi, gjatë shqyrtimin kryesor si dhe në fjalën përfundimtare ka deklaruar se edhe me tutje mbesin pranë padisë dhe kërkesëpadisë me të cilën kanë kërkuar anulimin e vendimeve të kundërshtuara me arsyetim se paditësi nga viti 2022 është regjistruar si SH.P.K. ne mënyrë të ligjshme ne Agjencinë për Regjistrimin e Bizneseve te Kosovës. Kërkesës

për regjistrim i janë bashkangjitur dokumentet identifikuese të aksionarëve, përfshirë pasaportën e njërit aksionar B.D. me numër E59UK3155 dhe me adrese banimi ne Rozhaje, Klekovacka, nr 3 Rozhajë, ne Malin e Zi.

5. Me date 07.08.2023 zv. Drejtoresha e Përgjithshme e ARBK-se, nxjerr Vendim nr.522 për Shfuqizimin e Certifikatës së Biznesit te Shoqërise “The Business Club” L.L.C, me seli në Prishtinë me pretendimin që z. B.D. është regjistruar me pasaporte te Malit te Zi, si Aksionar i Shoqërisë “The Business Club” L.L.C, dhe se ne atë pasaporte, ka përmbajte jo-kushtetuese te cilat cenojnë sigurinë publike te Republikës se Kosovës. Padiësi ndaj këtij vendimi ka ushtruar ankesë ne Komisionin për Shqyrtimin e Ankesave pranë Ministrisë se Tregtisë, Industrisë dhe Ndërmarrësish me pretendim se shfuqizimi i Certifikatës se Biznesit te padiësit, është lëshuar mbi bazën e vërtetimit te gabuar te gjendjes faktike dhe zbatim të gabuar të drejtës materiale. Komisioni i Ankesave me Vendimin e Shkalles se Dyte, me numër 5341/01-KOM të datës 11.09.2023 refuzon Ankesën kundër Vendimit të shkalles se parë dhe e lenë ne fuqi Vendimin e shkalles se pare. Konsideron se Vendimi i ankimuar është nxjerrë në gabim te zbatimit te se drejtës materiale dhe është Akt Administrativ i Paligjshëm sipas Nenit 52 par. 1.2., te Ligjit për Procedurën e Përgjithshme Administrative Zv. Drejtoresha e Përgjithshme e ARBK, nuk ka kompetence për të nxjerrë Vendimin e ankimuar, përkatësisht Nenit 10 te Ligjit Nr. 06/L-016 për Shoqëritë Tregtare, paragrafi 4 i këtij Neni thekson i përcakton kompetencat e Drejtorit të Përgjithshëm të ARBK-së. Prandaj konsideron se Drejtori i Përgjithshëm i ARBK (ne këtë rast, zv. Drejtoresha e Përgjithshme e ARBK), nuk ka të drejtë qe te vendose kërkesa, kushte ose kufizime qe nuk janë te përcaktuara shprehimisht me Ligjin për Shoqëritë Tregtare. Prandaj, duke qene se Ligi për Shoqëritë Tregtare, nuk përcaktohet shprehimisht kompetenca e Drejtorit te ARBK-se te nxjerre vendime per shfuqizimin e certifikatës se biznesit, e cila është mase ekuivalente me shuarjen dhe çregjistrimin e biznesit. Rrjedhimisht, Vendimi i Ankimuar është nxjerrë ne kundërshtim me Nenin 10 te Ligjit për Shoqëri Tregtare, nga organi jo-kompetent ne kundërshtim me Nenin 52 te Ligjit për Procedurën Administrative.
6. Me tutje deklaron se sipas Ligjit për Shoqëritë Tregtare ne nenin 45 paragrafi 4 dhe nenin 112 te ligjit, përcakton se shoqëria tregtare e organizuar ne forme te korporatës si ne rastin e Ankuesit, mund te shpërbehet ne rast te i) shpërbërjes vullnetare pas vendimit te miratuar nga aksionaret e shoqërise dhe ii) si rezultat i likuidimit te detyrueshëm ne rastet e falimentimit te shoqërisë ne procedurën e falimentimit para gjykatës kompetente.

7. Përveç kësaj, deklaron se personi juridik mund të shpërbehet sipas nenit 8 paragrafi 2 dhe nenit 11 të Ligjit nr. 04/L-030 "Për përgjegjësinë e personave juridik për vepra penale" si pjesë e sanksionit të vendosur nga gjykata në procedurë penale për shkak të përgjegjësisë penale të personit juridik për kryerjen e veprave penale.
8. Edhe po të kishte fushëveprim në Ligjin për Procedurën e Përgjithshme Administrative (LPPA), Vendimi i ankimuar është në kundërshtim me Parimin e ligjshmërisë sipas LPPA, sipas Neni 4, paragrafi 2, i LPPA-së përcakton që veprimi administrativ që cenon apo mund të cenojë të drejtë apo interes juridik të një personi, duhet të jetë i autorizuar nga një ligj. Prandaj sipas nenit sipas Neni 52 par. 1, pika 1.1, vendimi i kundërshtuar konsiderohet i kundërligjshëm. Po ashtu konsideron se Vendimi i ankimuar është në kundërshtim me Parimin e Proporcionaliteti, sepse edhe nëse pasaporta e aksionarit do të ishte në kundërshtim me ndonjë Ligj, ARBK do të mund të i jepte një afat Ankuesit për të përmirësuar detajet dhe të dhënat e Aksionarit, e jo të merrte masën aq drastike duke shfuqizuar Certifikatën e Biznesit. Konsideron që ky Vendim është i paligjshëm, sipas Neni 52 par. 1, pika 1.7 të LPPA-së dhe në kundërshtim me nenin 9 të LPPA-së, Parimin e Administratës së Hapur. Prandaj i propozon gjykatës të aprovoj si të bazuar padinë dhe të anulohet vendimet e kundërshtuara si të kundërligjshme sepse janë nxjerrë me një sërë shkeljesh procedurave të LPA-së pasi paditësi nuk është thirr të deklarohet në asnjë moment gjatë procedurës administrative të zhvilluar kundër tij, në kundërshtim me parimin e transparencës si dhe kundërshtim me parimin e ligjshmërisë pasi veprimet e organit të paditur nuk janë të bazuara me ligj, të normuara me LPA-së.

Kundërshtimet e të paditurës

9. E paditura ARBK në Ministrinë e Industrisë, Ndermarresisë dhe Tregtisë e përfaqësuar nga, nga Avokatura Shtetërore, përfaqësuese ligjore e të Paditurës, padinë dhe aktvendimin për përgjigje në padi e ka pranuar me datë 29.12.2023 nuk ka dorëzuar përgjigje në padi. Po ashtu në seancë të shqyrtimit kryesor përfaqësuesja e të paditurës e ftuar në mënyrë të rregullt nuk përfaqëson.

Provat e administruara

10. Gjukata me qëllim të vlerësimit të ligjshmërisë së vendimit kontestues dhe vërtetimit të drejtë dhe të plotë të gjendjes faktike, në seancën e shqyrtimit kryesor ka administruar këto prova: Vendimet e kundërshtuara: Vendimi Nr.5341/01-KOM të datës 11.09.2023, Vendimi Nr.522 i

datës 07.08.2023 çertifikatën e regjistrimit të biznesit “The Business Club” sh.p.k me NUI:812011683 me datë 09.02.2023, informatat mbi biznesin, dhe Ankesë e paditësit e dorëzuar në komision për shqyrtim të ankesave kundër vendimit Nr.522 e dorëzuar me datë 15.08.2023.

11. Me Vendimin Vendimi Nr.522 i datës 07.08.2023 Agjencioni i Regjistrimit të Bizneseve në Kosovë (ARBK) në Ministrinë e Industrisë, Ndermarrësisë dhe Tregtisë (ARBK) ka shfuqizuar Çertifikatën e Regjistrimit të Biznesit “The Business Club” sh.p.k me NUI:812011683 dhe ka obliguar Shoqërinë Tregtare “The Business Club” sh.p.k me NUI:812011683, që brenda 5 ditësh nga dita kur ky vendim behet i plotfuqishëm, të dorëzojë në ARBK, çertifikatën origjinale të regjistrimit të biznesit të datës 09.02.2023, me arsyetim se paditësi “The Business Club” sh.p.k me NUI:812011683 me datë 09.02.2023, ka parashtruar kërkesë në ARBK për regjistrim të biznesit, për ushtrimin e aktivitetit kryesor të biznesit: Aktivitete e këshillimit për biznes dhe këshilla për menaxhim dhe aktivitete të tjera të ngjashme. Ministria e Industrisë, Ndermarrësisë dhe Tregtisë (MINT), me Vendimin nr.4009/02 të datës 06.07.2023 ka themeluar komisionin për ri-verifikimin e dosjeve në ARBK. Raportit të Komisionit nr. 4427/02 me datë 21.07.2023, konstaton se në dosjen e Shoqërisë Tregtare “The Business Club” sh.p.k me NUI:812011683 është prezantuar dokumentin identifikues/pasaportën me nr. E59UK3155 në emër të aksionarit B.D. e lëshuar nga autoritetet e Republikës së Malit të Zi, ku në rubrikën: vendi i lindjes është shkruar "Pec, SRB". Ka konstatuar se përmbajtjet e tilla, nuk lejohet të përdoren në Republikën e Kosovës, për shkak se emërtimi i përdorur për vend lindjen dhe shtetin, ka shkaktuar shkelje të normave kushtetuese dhe një veprim i tillë, paraqet kërcënim serioz ndaj sigurisë publike të përcaktuar me nenin 57 dhe 58 të LPPA-së (Ligjit Nr.05/L-031 për Procedurën e Përgjithshme Administrative).

Vlerësimi i gjykatës

12. Pas vlerësimit të pretendimeve të përfaqësuesit të paditësit në seancë, deklarimeve në padi nga paditësi, kundërshtimeve sipas përgjigjes në padi nga e paditura, si dhe në bazë të provave të administruara në seancën e shqyrtimit kryesor, Gjykata vlerësoi ligjshmërinë e vendimit kontestues në përputhje me nenin 43 dhe 44 të LKA-së, dhe gjeti se kërkesëpadija e paditësit është e bazuar.

13. Nga provat e administruara gjykata vërtetoi këtë gjendje faktike: paditësi “The Business Club” sh.p.k me NUI:812011683, është regjistruar si biznes në ARBK, me datë me datë 09.02.2023,

si shoqëri me përgjegji të kufizuar, për ushtrimin e aktivitetit kryesor të biznesit: Aktivitete e këshillimit për biznes dhe këshilla për menaxhim dhe aktivitete të tjera të ngjashme. Sipas Informatave mbi biznesin pronar të biznesit të themeluar është përveç të tjerëve edhe aksionari B.D. me numër E59UK3155 i regjistruar me adrese banimi në Rozhaje, Klekovacka, nr 3 Rozhajë, në Malin e Zi.

14. E paditura Agjencioni i Regjistrimit të Bizneseve në Kosovë (ARBK) në Ministrinë e Industrisë, Ndermarresisë dhe Tregtisë (ARBK) me Vendimin nr.4009/02 të datës 06.07.2023 ka themeluar komisionin për ri-verifikimin e dosjeve në ARBK.
15. E paditura ka vlerësuar se në dosjen e Shoqërisë Tregtare “The Business Club” sh.p.k me NUI:812011683 janë paraqitur dokumente me përmbajtje kundërkushtetuese dhe me Vendim Nr.522 i datës 07.08.2023 e paditura e ka shfuqizuar Çertifikatën e Regjistrimit të Biznesit të paditësit dhe ka obliguar Shoqërinë Tregtare “The Business Club” sh.p.k me NUI:812011683, që brenda 5 ditësh nga dita kur ky vendim behet i plotfuqishëm, të dorëzojë në ARBK, certifikatën origjinale të regjistrimit të biznesit të datës 09.02.2023.
16. Ndaj këtij vendimi, paditësi “The Business Club” sh.p.k, me datë 15.08.2023. ka parashtruar ankesë, për shkak të zbatimit të gabuar të ligjit material, zbatimi jo të drejtë dhe të gabuar të procedurës dhe vërtetimi jo të plotë dhe të gabuara të gjendjes faktike, me arsyetim se asnjë herë nuk e ka pranuar Raportin e Komisionit nr. 4427/02 të datës 21.07.2023 përveç vendimit të zv. Drejtoreshës së ARBK-së të datës 07.08.2023, me të cilën shfuqizohet certifikata e biznesit. Përveç të tjerash në ankesë, ankuesi e kundërshton kompetencën e zv. Drejtoreshës së ARBK-së për interpretimin e Kushtetutës së Republikës së Kosovës edhe kompetencën për shfuqizimin e certifikatës së biznesit.
17. Me Vendim të Komisionit për Shqyrtimin e Ankesave për Regjistrimin e Bizneseve me Nr.5341/01-KOM të datës 11.09.2023, refuzohet ankesa dhe mbete në fuqi vendimi me numër 522 datë 07.08.2023, me arsyetim se në dosjen e Shoqërisë Tregtare " The Business Club" sh.p.k, janë paraqitur dokumente nga pala, pasaporta e aksionarit B.D., ku vendi i lindjes shënon “PEC-SRB”. Me tutje thekson se ndryshimi i të dhënave të biznesit është bërë përmes aplikimit online dhe më këtë rast është paraqitur dokumenti me nr. EU59UK3155, ku vendi i lindjes shënon “PEC-SRB”.

18. Gjykata i vlerëson të pabazuara pretendimet e paditësit lidhur me autorizimet dhe kompetencën të paditurës që të shfuqizoj certifikatën e një biznesi sipas Nenit 10 i Ligjit për Shoqëri Tregtare.
19. Se pari gjykata ri kujton se rregullimi i procesit të regjistrimit përfshirë ndryshimet tjera të të dhënave ekzistuese bie në funksionin dhe kompetencën e ARBK-së rregullat e të cilës janë të detyrueshme për shoqëritë tregtare të përcaktuar me nenin 9, ku përcaktohet se: 1. *ARBK bën regjistrimin e Shoqërive Tregtare dhe Emrave Tregtarë, si dhe është e autorizuar për kryerjen e funksioneve të tjera të përcaktuara me këtë Ligj apo funksioneve që i janë caktuar ARBK me ligje të tjera dhe Nenit 10 paragrafi 4 të LSHT-së, ku përcaktohet se: Drejtori i Përgjithshëm i ARBK ushtron kompetenca drejtuese dhe nxjerr vendime dhe udhëzime të tjera të detyrueshme për rregullimin e procesit të regjistrimit të Shoqërive Tregtare për qendrat e regjistrimit në pajtim të plotë me këtë ligj. Shprehimisht përcaktohet se vendimet dhe udhëzimet e nxjerra nga Drejtori i Përgjithshëm i ARBK sipas këtij ligji nuk do të vendosin kërkesa, kushte ose kufizime që nuk janë përcaktuar shprehimisht me këtë ligj.*
20. Mënyra e ndryshimeve të dhënave ekzistuese në Regjistër bëhet sipas aplikimit të Shoqërisë Tregtare, dhe rregullohet konform nenit 17 ku përcaktohet se: 1 ***ARBK-ja nuk ka të drejtë të refuzojë regjistrimin fillestar, regjistrimet tjera dhe ndryshimin dhe plotësimin në e të dhënave ekzistuese nëse dorëzohen të gjitha dokumentet që kërkohen me ligj dhe nëse ato janë në përputhje me kërkesat e këtij ligji apo ligjeve të tjera në fuqi*** dhe 3. *Aplikimi nga Shoqëria Tregtare duhet të përcillet me dokumente që përbëjnë bazën për regjistrim në Regjistër. Dokumenti i dorëzuar në ARBK duhet të përmbajë informatat e përcaktuara me këtë ligj dhe ligje të tjera në fuqi.*
21. Prandaj gjykata vlerëson se janë ta pabazuara pretendimet që i referohen kompetencës së ARBK-së dhe Drejtorit të Përgjithshëm të ARBK-së, sepse ARBK është institucion i vetëm në Republikën e Kosovës me përgjegjësi për regjistrimin e Shoqërive Tregtare dhe Emrave Tregtarë, si dhe është e autorizuar për kryerjen e funksioneve të tjera të përcaktuara me këtë Ligj apo funksioneve që i janë caktuar ARBK me ligje të tjera (sipas nenit 9 të LSHT), dhe konform Nenit 17 paragrafi, 7. ***nëse ARBK vlerëson se aplikimi për regjistrim, çregjistrim apo ndryshim të dhënave në Regjistër nuk përmbush kërkesat e këtij ligji apo ndonjë ligji tjetër në fuqi, si dhe për shkak të kësaj mos përmbushjeje,[...] njofton Përfaqësuesin e Autorizuar ose Përfaqësuesin me Prokurë për këtë fakt, në pajtim me legjislacionin në fuqi, si dhe cakton një***

afat jo më të gjatë se dhjetë (10) ditë pune për korrigjimin e mangësisë(ve). Nëse këto mangësi nuk korrigojnë deri në fund të afatit, ARBK-ja mund të refuzojë përmbylljen e aplikimit.

22. Nga interpretimi i dispozitave ligjore të cituara më lart, rezulton se me rastin a aplikimit për regjistrim rrjedh detyrimi i Shoqërive Tregtare ti përmbahen rregullave të detyrueshme për shoqëritë tregtare, që regjistrimet dhe ndryshimin dhe plotësimin në e të dhënave ekzistuese të mbështeten me dokumente që përbëjnë bazën për regjistrim në Regjistër dhe përmbajnë informata në pajtim me këtë ligj dhe ligjet e tjera në fuqi.
23. Gjykata e vlerëson jo kontestues arsyetimin e dhënë nga e paditura se Shoqëria Tregtare “The Business Club” sh.p.k. në dosje janë dorëzuar dokumente pasaporta me nr. EU59UK3155 e aksionarit B.D. e lëshuar nga shteti i Malit të Zi, ku vendi i lindjes shënon “PEC-SRB”. këtë fakt e ka konfirmuar si të vërtetë edhe vet paditësi në padi dhe ankesë në të cilën ka deklaruar se kërkesës për hapje të biznesit ia ka bashkangjitur dokumentet identifikuese të aksionarëve dhe pasaportën e njërit nga aksionareve B.D., shtetas i Republikës së Malit të Zi, me pasaportë nr. EU9UK3155.
24. Në këtë rast shtrohet pyetja se informatat që përmban dokumenti kontestues: pasaporta me nr. K72PU2420 e lëshuar nga autoritetet e Republikës së Malit të Zi në emër të B.D. (pronar/ aksionar i shoqërisë tregtare), ku në rubrikën: vendi i lindjes është shkruar "Pec, SRB"- a është në kundërshtim me këtë ligj apo ligjet e tjera në fuqi?
25. Kushtetuta e Republikës së Kosovës, Neni 12 [Pushteti Lokal] përcakton: Njësi themelore territoriale të vetëqeverisjes lokale në Republikën e Kosovës janë komunat.
26. Ligji Nr. 03/L-040 për Vetëqeverisjen Lokale me parimet e përgjithshme të përcaktuara me Neni 4 par .1, përcakton: *Komuna është njësi themelore e vetëqeverisjes lokale në Republikën e Kosovës, e përbërë nga një komunitet i qytetarëve në një territor të caktuar, të përcaktuar me ligj, e cila ushtron tërë pushtetin i cili nuk është i rezervuar shprehimisht për institucionet qendrore. Po i njëjti ligj në Nenin 6, përcakton Emrat dhe Kufijtë: *Komunat kanë emrat dhe kufijtë e tyre, siç përshkruhet në Ligjin për Kufijtë administrativ të Komunave dhe mund të ndryshohen vetëm në përputhje me atë ligj.**

27. Ligji Nr. 03/L-041 për Kufijtë Administrativ të Komunave rregullon organizimi territorial të vetëqeverisjes lokale të Republikës së Kosovës, përcaktohet territori i komunës si njësi e vetëqeverisjes lokale, përcaktohen kufijtë administrativ komunal, emrat dhe selitë e komunave, [...] Neni 5.1 përcakton që *Komuna është njësi themelore e vetëqeverisjes lokale në Republikën e Kosovës, pika 15. Komuna e Pejës me seli në Pejë.*
28. Prandaj, në kuptim të dispozitave kushtetuese dhe ligjore, Gjykata vlerëson se përmbajtja dokumentit/pasaporta me nr. K72PU2420 e lëshuar nga autoritetet e Republikës së Malit të Zi në emër të B.D. (pronar/ aksionar i shoqërisë tregtare), ku në rubrikën: vendi i lindjes - Komuna e Komuna e Pejës paraqitet me seli në Republikën e Serbis, „Pec, SRB” - është në kundërshtim me dispozitat kushtetuese dhe ligjore të cituara më lart.
29. Gjykata ri kujton se kërkesat ligjore për Regjistrimi fillestar dhe ndryshimi i të dhënave të Shoqërisë me Përgjegjësi të Kufizuar janë të detyrueshme për shoqërite tregtare, kjo çështje definohet saktësisht në Nenin 33 të LSHT, ku përcaktohet: *Për regjistrimin e Shoqërisë me Përgjegjësi të Kufizuar, Përfaqësuesi i Autorizuar ose Përfaqësuesi me Prokurë duhet të plotësojë dhe dorëzojë në ARBK: 1.1. formularin e përgatitur nga ARBK për këtë qëllim, duke përfshirë të dhënat vijuese: 1.1.1. emrat dhe adresat e Aksionarëve dhe Aksioneve të tyre në Shoqëri me Përgjegjësi të Kufizuar; 1.1.2. emrat dhe adresat e Drejtorëve Menaxhues dhe Përfaqësuesve të tjerë të Autorizuar ose Përfaqësuesve me Prokurë sipas nenit 24 të këtij ligji, [...] 1.1.3. emrat dhe adresat e anëtarëve të Bordit të Drejtorëve, nëse Shoqëria me Përgjegjësi të Kufizuar ka Bord të Drejtorëve. dhe 1.2. kopjen e dokumentit personal të identifikimit të Përfaqësuesit të Autorizuar; dhe me kërkesat e përcaktuara përmes Udhëzimit Administrativ(MINT) Nr. 01/2021 për Regjistrimin e Shoqërive Tregtare Neni 8 par. 1, ku përcaktohet: *Për Regjistrimin e Shoqërisë me Përgjegjësi të Kufizuar, parashtruesi duhet të plotësojë dhe dorëzojë në ARBK: 1.1. Formularin përkatës për regjistrimin e Shoqërisë me Përgjegjësi të Kufizuar; 1.2. Fotokopjen e dokumentit personal të identifikimit të Themeluesve si dhe Përfaqësuesit të Autorizuar ose Përfaqësuesit me Prokurë – nëse Aksionari është shtetas i huaj atëherë fotokopja e pasaportës; kur aksionar është një Shoqëri Tregtare, certifikata e regjistrimit në Kosovë, nëse themelues është Shoqëria e Huaj Tregtare, certifikata e regjistrimit dhe informatat e biznesit jo më të vjetra se tre (3) muaj;**
30. Po ashtu Neni 17 paragrafi 8 i LSHT-së, përcakton detyrimin që: Çdo Shoqëri Tregtare është e obliguar të përditësojë të dhënat e regjistruara në Regjistër, si dhe të sigurojë saktësinë e tyre të

përhershme dhe përputhshmërinë e tyre me kërkesat e këtij ligji. Ndryshimi i të dhënave nga ato të regjistruara duhet të paraqitet në ARBK brenda pesëmbëdhjetë (15) ditëve nga data kur ka ndodhur ndryshimi përkatës.

31. Gjykata vlerëson se aplikimi/ndryshimi i të dhënave të biznesit është bërë përmes aplikimit online, e cila formë lejon qasje që vet aplikuesi të bëjë regjistrimin dhe më këtë rast është paraqitur dokumenti me nr. EU59UK3155, ku vendi i lindjes shënon “PEC-SRB”. Prandaj e paditura ARBK në Ministrinë e Industrisë, Ndermarrësise dhe Tregtise (MINT), konform autorizimeve dhe përgjegjësive ligjore për vërtetimin e saktësisë së të dhënave (nenit 21 të LSHT), me Vendimin nr.4009/02 te datës 06.07.2023 ka themeluar Komisionin për ri-verifikimin e dosjeve ne ARBK, dhe është ligjërisht e autorizuar që të korrigjoj gabimet çoftë edhe me revokim/shfuqizim të certifikatës së regjistrimit e cila, i cili revokim/shfuqizim nuk nënkupton në asnjë mënyrë shpërbërje të SH.P.K-së apo falimentim në kuptim Neni 112 të LSHT dhe as pushim të personit juridik sipas Ligji Nr. 04/L-030 për Përgjegjësinë e Personave Juridik për Vepra Penale, por është i barasvlershëm me refuzim të regjistrimit sepse kemi të bëjmë me kërkesa formale të regjistrimit që janë të detyrueshme në secilin juridiksion te secilit shtetet. Pra janë kërkesa kategorikisht formale dhe në këtë rast nuk kemi të bëjmë me natyrën e shoqërisë sipas Neni 78 të LSHT, në raport me përgjegjësinë e ndarë të Shoqërisë me Përgjegjësi të Kufizuar si person juridik nga aksionarët, sepse përgjegjësia i referohet të drejtave dhe detyrimeve që merr përsipër SHPK në ushtrimin veprimtarisë ekonomike, siç janë: të ushtrrojë padi ose të jetë e paditur, të lidh kontrata, të marrë borxhe apo të krijojë detyrime etj. Ndërsa kërkesat e regjistrimit janë formale dhe të gjitha dokumentet përfshirë përmbajtjen e tyre duhet të jenë në përputhje me parimet kushtetuese dhe ligjet ne fuqi.
32. Neni 17 paragrafi 7 i LSHT-se e autorizon ARBK te: *vlerësoj nëse aplikimi për regjistrim, çregjistrim apo ndryshim të dhënave në Regjistër i përmbush kërkesat e këtij ligji apo ndonjë ligji tjetër në fuqi, si dhe përcakton se për shkak të kësaj mos përmbushjeje,[...] ARBK njofton Përfaqësuesin e Autorizuar ose Përfaqësuesin me Prokurë për këtë fakt, në pajtim me legjislacionin në fuqi, si dhe cakton një afat jo më të gjatë se dhjetë (10) ditë pune për korrigjimin e mangësisë(ve). Nëse këto mangësi nuk korrigjohen deri në fund të afatit, ARBK-ja mund të refuzojë përmbylljen e aplikimit.*
33. Po ashtu, LSHT Neni 21 paragrafi 1, përcakton që ARBK mund t'i korrigjojë gabimet në çdo kohë....[...] 3. Nëse ARBK-ja ka informata në lidhje me pasaktësinë e një të dhëne të regjistruar

apo që një e dhënë mungon, ARBK bën kërkimet e duhura. 4. Pas vërtetimit që të dhënat në Regjistër janë të pasakta apo mungojnë, ARBK-ja njofton Shoqërinë Tregtare në aplikimin e së cilës duhet bërë regjistrimi. Nëse nuk ka kundërshtim ndaj regjistrimit apo korigjimit të informatave brenda pesëmbëdhjetë (15) ditësh pas atij njoftimi, ARBK-ja bën regjistrimin apo korigjon të dhënat. Pas pranimit të kundërshtimit, ARBK-ja vendos nëse ai kundërshtim ka bazë. paragrafi 6 përcakton Nëse dorëzohen informata të pasakta në ARBK, Shoqëria Tregtare dhe Përfaqësuesi i Autorizuar ose Përfaqësuesi me Prokurë që kanë dorëzuar dokumentet në ARBK mbajnë përgjegjësi për dëmet që mund të jenë shkaktuar me keqdashje.

34. Mirëpo, Gjykata e vlerëson të bazuar pretendimin e paditësit “The Business Club” SH.P.K se e paditura asnjëherë në asnjë fazë të procedurës nuk e kishte njoftuar paditësin me përmbajtjen e Raportit të Komisionin për ri-verifikimin e dosjeve ne ARBK me nr. 4427/02 të datës 21.07.2023, përveç se kur e paditura kishte marrë vendim 522 të datës 07.08.2023 për shfuqizim të certifikatës së biznesit.
35. Përveç që paditësit nuk i ishte dhënë mundësia të njoftohet me përmbajtjen e raportit të komisionit të njëjtit nuk i është dhënë mundësia për korigjim. Përderisa, e paditura nuk e konteston autenticitetin dhe vlefshmërinë e pasaportës me nr. EU59UK3155 të lëshuar nga autoritetet e Republikës së Malit të Zi në emër të B.D. (pronar/ aksionar i shoqërisë tregtare), por i referohet saktësisë së përshkrimit të Komunës së Pejës, ku në rubrikën: vendi i lindjes - Komuna e Komuna e Pejës paraqitet "Pec, SRB", e që nuk reflekton Komunën e Pejës si njësi themelore e vetëqeverisjes lokale brenda kufijve administrativ të Republikës e Kosovës.
36. Gjykata vlerëson se vendimi i të paditurës për shfuqizimi të certifikatës së biznesit të paditësit pa i dhënë mundësinë e korigjimit, siç përcaktohet me Nenit 17 paragrafi, 7. është në kundërshtim me parimin e ligjshmërisë, proporcionalitetit dhe transparencës, sepse po që së e paditura ka vlerësuar se nuk përmbushen kërkesat e këtij ligji apo ndonjë ligji tjetër në fuqi do duhej ta njoftonte paditësin dhe ti ipej një afat për korigjim.
37. Përveç kësaj, po që se korigjimi i të dhënave do të ishte i pamundur të realizohet me kërkesë personale të paditësit/aksionarit për shkak të praktikës/politikës së autoriteteve të Malit të Zi, kjo çështje do të duhej të afirmohej me marrëdhënie diplomatike midis dy shteteve. Sepse përgjithësisht në drejtën ndërkombëtare pas procesit të njohjes se pavarësisë së një shtetit nga një shtet tjetër pritet të ndryshohen dokumentet administrative duke përfshirë edhe

referimet/përshkrimin e njësive themelore të vetëqeverisjes lokale brenda kufijve administrativ të shtetit të pavarur. Mirëpo, po qe së pasaporta është lëshuar pas njohjes së pavarësisë së Shtetit të Kosovës nga shteti i Malit të Zi dhe nëse rezulton që edhe pas njohjes së pavarësisë përshkrimi i autoriteteve të Malit të Zi për qytet-in/et e Kosovës i referohet “Pec,SRB” kjo mund të rrjedhë si pasojë e çështjeve të trashëguara nga sistemi juridik dhe struktura administrative nga regjimi paraardhës. Prandaj, parimisht do të duhej të shqyrtohej vlefshmëria e këtyre dokumenteve me ligje dhe procese administrative apo nëpërmjet Marrëveshjeve bilaterale të qartësohet statusi dhe vlefshmëria e dokumenteve të lëshuara para njohjes së pavarësisë dhe ndryshimet që do të duhej të inkorporohen pas njohjes së pavarësisë, në mënyrë që veprimet e organeve publike të jenë të parashikueshme dhe të respektojnë pritshmërinë legjitime dhe të arsyeshme të personave siç përcaktohet në Neni 8 të LPPA-së.

38. Prandaj, Gjykata vlerëson se e paditura ARBK ka vepruar në kundërshtim me Nenit 17 paragrafi, 7 të LSHT-së sepse nuk i ka dhënë mundësi paditësit që të njihet me vlerësimet e Raportit të Komisionin për ri-verifikimin e dosjeve në ARBK me nr. 4427/02 të datës 21.07.2023 dhe që brenda afatit të përcaktuar ligjorë ta njoftoj për mundësinë korrigjimit të dhënave apo paraqitjes së kundërshtimit para se të marr vendim për shfuqizim të certifikatës së biznesit, nga rezulton se e paditura në procedurë administrative ka vepruar në kundërshtim me parimin e proporcionalitetit dhe parimin e administratës së hapur të përcaktuar në Ligji (Nr. 05/L -031) për Procedurën e Përgjithshme Administrative (LPPA), ngase përmes vendimit të marrë në kundërshtim me veprimet ligjore procedurale sipas nenit 17.7 të LSHT, vendim për shfuqizim të certifikatës së biznesit rezulton të jetë jo proporcional, sipas nenit 5 të LPPA-së, ku përcaktohet: *1. Një veprim administrativ, që për arsye të mbrojtjes së interesit publik kufizon apo cenon të drejtat apo interesat juridike të një personi, duhet të jetë në pajtim me parimin e proporcionalitetit. 2. Një veprim administrativ është në pajtim me parimin e proporcionalitetit vetëm nëse i plotëson këto kushte: 2.1. është i domosdoshëm për të arritur qëllimin e përcaktuar në ligj; 2.2. është i përshtatshëm për të arritur qëllimin e përcaktuar në ligj, dhe 2.3. kufizimi apo cenimi i të drejtës apo interesit juridik nuk është në shpërpjesëtim me realizimin e qëllimit të ndjekur*, Nenin 8 ku përcaktohet se Veprimet e organeve publike duhet të jenë të parashikueshme dhe të respektojnë pritshmërinë legjitime dhe të arsyeshme të personave, dhe nenit 9 të LPPA-së, ku përcaktohet se: *1. Organet publike duhet të veprojnë me transparencë. 2. Organi publik duhet të garantojë të drejtën e palës për t’u informuar mbi ecurinë e procedurës administrative, qasjen në dosjen dhe dokumentet e tij dhe të drejtën e njoftimit me mjete të përshtatshme, në pajtim me këtë Ligj.*

39. Prandaj, vërtetohet se Vendimi i Komisionit për Regjistrimin e Bizneseve si organ i shkallës së dytë me shifrën 5341/01-KOM të datës 11.09.2023, i nxjerrë nga Komisioni për Shqyrtimin e Ankesave për Regjistrimin e Bizneseve, dhe Vendimit me numër 522 të datës 07.08.2023 është nxjerrë në shkelje të dispozitave të LPPA-së, nenit 52 paragrafi, 1.3, që e bëjnë të paligjshëm aktin administrativ ku përcaktohet se: *1. Një akt administrativ është i paligjshëm nëse: 1.3. është rezultat i shkeljes të dispozitave lidhur me procedurën administrative.* Gjykata i vlerësoj edhe provat e tjera kryesisht kontratat ne raportet juridike civile te paditësit por konstaton se këto prova nuk ishin me rendësi për vlerësimin e ligjshmërisë se vendimit te kundërshtuar.
40. Bazuar në nenet 13, par. 1, nën par. 1.12 lidhur me par. 5 të Ligjit nr. 08/L-015 për Gjykatën Komerciale dhe nenin 46 të Ligjit për Konfliktet Administrative, gjykata vendosi si në dispozitiv të këtij aktgjykimi. Lidhur me shpenzimet e procedurës gjykata ka vendosur në kuptim të nenit 64 të LKA, që secila palë t'i bartë shpenzimet e veta procedurale.

GJYKATA KOMERCIALE E KOSOVËS

Dhomat e Shkallës së Parë

Departamenti për Çështje Administrative

KA.nr.386/23, datë 29.04.2024

Gjyqtarja

Vlora Pacolli Rexhepi

KËSHILLË JURIDIKE: Kundër këtij aktgjykimi palët kanë të drejtë ankese në afat prej 15 (pesëmbëdhjetë) ditëve, nga dita e pranimit të aktgjykimi, në Dhomën e Shkallës së Dytë në Gjykatën Komerciale të Kosovës, përmes Dhomave të Shkallës së Parë të kësaj Gjykate.